

## Belanjawan 2022 tangani segera isu fiskal negara

Oleh Mohd Zaky Zainuddin - Oktober 4, 2021 @ 10:33am  
zaky@bh.com.my



Perdana Menteri, Datuk Seri Ismail Sabri Yaakob - Foto BERNAMA

KUALA LUMPUR: Belanjawan 2022 yang akan dibentangkan di Dewan Rakyat pada 29 Oktober ini akan tangani segera semua isu fiskal.

Perdana Menteri, Datuk Seri Ismail Sabri Yaakob, berkata belanjawan tahunan yang bakal dibentangkan oleh Menteri Kewangan, Tengku Datuk Seri Zafrul Tengku Abdul Aziz akhir bulan ini menempa sejarah apabila buat pertama kali tampil dengan Kenyataan Pra Belajawan yang memberi penekanan kepada cadangan dalam bajet berkenaan.

"Kerajaan akan terus berpegang pada prinsip 'pastikan semua tidak ketinggalan' untuk Malaysia menjadi negara maju sepenuhnya dan dapat memanfaatkan rakyat," katanya.

Beliau berkata demikian ketika menyampaikan ucapan aluan pada Forum Khazanah Megatrends 2021 "The Invention of Tomorrow: Crafting Our New Collective Narrative" secara maya hari ini. Ismail Sabri yang juga Pengerusi Khazanah Nasional Bhd (Khazanah) berkata, kerajaan juga mengedarkan lima Kertas Perundingan Awam Belanjawan 2022 berkaitan pelbagai masalah pembaharuan struktur.